



Redaksioneel

Die redaksie bied graag die volgende *Koers*-uitgawe aan. In hierdie uitgawe val die fokus op 'n christelik-wetenskaplike perspektief in die omgang met kernkwessies in die huidige samelewing; op die interaksie tussen werklikheidsbeskouing en kultuur, etnisiteit en verskillende godsdienste; asook op 'n besinning oor etiese besluitneming in 'n spesifieke vakgebied. Drie van die artikels wat verskyn, is die laaste in 'n reeks van die onderskeie outeurs.

Die uitgawe open met 'n uitstekende artikel waarin B.J. van der Walt voortgaan met sy navorsing oor die filosofiese wortels van die gewilde “waardegedrewenheid” van instellings. In hierdie artikel probeer hy vanuit 'n christelik-filosofiese perspektief vasstel wat die plek, aard en gesag van waardes is. Hy bring 'n verskeidenheid perspektiewe van sleuteldenkers in die reformatoriese filosofie byeen en verklaar hulle interpretasie van waardes deur, onder meer, hulle konteks en reaksie op die westerse filosofie in ag te neem. Die verhelderende stellings wat hieruit na vore kom, pas hy toe om 'n alternatiewe voorstel te bied waarin diverse standpunte binne instellings, soos die Noordwes-Universiteit, geakkommodeer kan word.

P. Simons se artikel ondersoek die verhouding tussen die tegnisme en ekonomisme, gegrond op albei se verhouding tot die nuttigheidsdenke. Die omvattende voorkoms van hierdie benaderings in die westerse kultuur, maak sy ontginning van 'n alternatiewe voorstel vanuit 'n reformatoriese perspektief, hoogs relevant. Williams se derde artikel oor die sekularisme argumenteer dat die Heilige Gees ten grondslag lê van 'n eiesoortige gemeenskap, gekenmerk deur skeiding en verwantskap, wat die oorsake van sekularisme in die samelewing teenwerk.

Drie artikels het as agtergrond botsende wêreldbeskouings binne 'n spesifieke etniese, godsdienste- en kulturele konteks. P.O. Abioje verken die sosio-politieke invloed van kritiese profesie in kontemporêre Afrika deur bybelse, Afrika en Islamitiese wêreldbeskouings te vergelyk. Die rol wat werklikheidsvisie-transformasie speel in die ontwikkeling en onderwyskundige transformasie van 'n gemeenskap van die Lamba in Zambië kom onder die loep in 'n artikel deur

J. Compion, J.L. van der Walt, H.J. Steyn en C.C. Wolhuter. J. Hexham ondersoek die rol van godsdiens in die VSA, met spesifieke klem op die implikasies vir die verhouding tussen Christendom en politiek.

G.M. Steyn se artikel oor die skepping van doelbewus-uitnodigende skole deur middel van professionele ontwikkeling kan saamgelees word met 'n vorige artikel van haar wat in *Koers* verskyn het. M. Swanepoel se artikel oor etiese besluitneming in forensiese psigologie is 'n waardevolle bydrae in 'n area waarin tot dusver redelik min gepubliseer is. Die ontleding van die verband tussen 'n vakdissipline en die etiek, asook 'n besinnende perspektief daarop, behoort verdere gesprek oor hierdie tema te stimuleer.

Ten slotte verskyn daar 'n aantal resensies.

Lesers word uitgenooi om opvolgartikels voor te lê vir publikasie.

Helena Hoogstad

Redakteur